

Nacrt

Na osnovu člana 6. Statutarne Odluke o organizaciji Grada Tuzla u skladu sa Zakonom o Gradu Tuzla ("Službeni glasnik Grada Tuzla", broj: 1/14, 3/15, 7/15 i 12/15) i člana 13., a u vezi sa članom 8. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj 49/06 i 51/09), Gradsko vijeće Grada Tuzla, na sjednici održanoj dana _____, donosi:

O D L U K U
o uslovima, kriterijima i postupku dodjele sredstava
za sufinansiranje mjera smanjenja aerozagađenja na području grada Tuzle

OSNOVNE ODREDBE

Član 1.
(Predmet)

Ovom Odlukom utvrđuju se uslovi, kriteriji i postupak za dodjelu sredstava za sufinansiranje mjera smanjenja aerozagađenja na području grada Tuzle.

Član 2.
(Primjena)

Odredbe ove Odluke primjenjuju se na individualne stambene i stambeno-poslovne objekte u obuhvatu zona toplifikacije usvojenih od strane Gradskog vijeća Grada Tuzla.

Član 3.
(Značenje pojedinih izraza)

- (1) Mjere smanjenja aerozagađenja u smislu odredbi ove Odluke podrazumijevaju:
 - (a) Nabavku i ugradnju toplotnih pumpi tipa zrak – voda, voda – voda i zemlja – voda, sa pratećom opremom i radovima, kao okolišno prihvatljiv način zagrijavanja objekata.
 - (b) "Utopljanje" objekata radi smanjenja toplinskih gubitaka, odnosno nabavku i ugradnju materijala za izolaciju vanjskih zidova i tavanice objekata.
- (2) Energijski pregled je postupak utvrđivanja postojeće potrošnje energije u objektu i energetskim karakteristikama objekta.

USLOVI I NAČIN DODJELE SREDSTAVA

Član 4.
(Opći uslovi za dodjelu sredstava za sufinansiranje)

Podnosilac prijave mora ispunjavati sljedeće opće uslove:

- (a) da ima prijavljeno prebivalište i boravište na adresi objekta koji je predmet prijave na javni poziv, najmanje 90 (devedeset) dana prije objave javnog poziva,
- (b) da je vlasnik objekta koji je predmet prijave na javni poziv,
- (c) da posjeduje građevinsku dozvolu za objekat, odnosno dokaz da je objekat uplanjen,
- (d) da se za zagrijavanje objekta koji je predmet prijave na javni poziv kao energent koriste fosilna goriva,

- (e) da je od strane ovlaštenog lica u skladu sa Zakonom o energijskoj efikasnosti u Federaciji Bosne i Hercegovine ("Službene novine Federacije BiH", broj 22/17) izvršen energijski pregled objekta koji je predmet prijave na javni poziv,
- (f) da ispunjavaju i druge uslove iz javnog poziva.

Član 5.

(Posebni uslovi za dodjelu sredstava za sufinansiranje nabavke i ugradnje toplotnih pumpi)

Pored općih uslova iz člana 4. podnosilac prijave za dodjelu sredstava za sufinansiranje nabavke i ugradnje toplotnih pumpi mora ispunjavati sljedeće posebne uslove:

- (a) da je saglasan da po izvršenoj ugradnji toplotne pumpe neće koristiti uređaj koji je koristio za zagrijavanje objekta do ugradnje toplotne pumpe, odnosno uređaj za zagrijavanje sa pogonom na fosilno gorivo,
- (b) da objekat po izvršenom energetsom pregledu ima vrijednost utroška toplotne energije jednaku ili manju od 100 kWh/m² godišnje.

Član 6.

(Posebni uslovi za dodjelu sredstava za sufinansiranje nabavke i ugradnje materijala za izolaciju vanjskih zidova i tavanice)

Objekat koji je predmet prijave na javni poziv za dodjelu sredstava za sufinansiranje nabavke i ugradnje materijala za izolaciju vanjskih zidova i tavanice, po izvršenom energetsom pregledu mora imati vrijednost utroška toplotne energije veću od 100, ali ne veću od 230 kWh/m² godišnje.

Član 7.

(Dokazi o ispunjavanju uslova za sufinansiranje)

(1) O ispunjavanju uslova propisanih Odlukom podnosilac prijave dužan je dostaviti sljedeće dokaze:

- (a) PBA3 obrazac izdat od strane MUP-a TK, ne stariji od 30 (trideset) dana, računajući od momenta objave javnog poziva i uvjerenje nadležnog organa o mjestu boravišta,
- (b) zemljišnoknjižni izvadak izdat od strane Općinskog suda u Tuzli, za objekat koji je predmet prijave na javni poziv,
- (c) građevinska dozvola izdata od strane nadležnog organa, odnosno dokaz da je objekat koji je predmet prijave na javni poziv uplanjen,
- (d) izjava podnosioca prijave ovjerena kod nadležnog organa da po izvršenoj ugradnji toplotne pumpe neće koristiti uređaj koji je koristio za zagrijavanje objekta do ugradnje toplotne pumpe, odnosno da neće koristiti uređaj za zagrijavanje objekta sa pogonom na fosilna goriva,
- (e) dokaz o izvršenom energijskom pregledu objekta koji je predmet prijave na javni poziv.

(2) Podnosilac prijave dužan je dokaze iz stave 1. Ovog člana dostaviti u originalu ili ovjerenoj fotokopiji.

Član 8.

(Iznos sredstava za sufinansiranje mjera smanjenja aerozagađenja)

- (1) Dodjela sredstava za sufinansiranje mjera smanjenja aerozagađenja vrši se u iznosu do 50% od vrijednosti nabavke i ugradnje toplotne pumpe sa pratećom opremom i radovima, a ne

više od 5.000,00 KM ili iznosu do 50% za sufinansiranje nabavke i ugradnje materijala za izolaciju vanjskih zidova i tavanice, a ne više od 5.000,00 KM.

- (2) U toku jedne budžetske godine podnosilac prijave može ostvariti pravo na sufinansiranje samo jedne mjere smanjenja aerozagađenja iz stava 1. ovog člana u naznačenim iznosima.

KRITERIJI ZA RANGIRANJE PODNOSILACA PRIJAVA NA JAVNI POZIV

Član 9. (Kriterij za dodjelu sredstava)

Kriterij za rangiranje podnosilaca prijave na javni poziv u okviru konačnih rang listi iz ove Odluke predstavlja iznos vrijednosti utroška toplotne energije izražen u kWh/m² godišnje.

Član 10. (Rangiranje u okviru konačnih rang listi korisnika sredstava za sufinansiranje mjera smanjenja aerozagađenja)

- (1) U skladu sa odredbom člana 9. smatra se da je prvi na konačnoj rang listi podnosilac prijave čiji objekat ima najnižu vrijednost utroška toplotne energije u okviru raspona propisanih u članu 5. i 6. Odluke.
- (2) Sufinansiranje mjera za smanjenje aerozagađenja vrši se do potpunog utroška sredstava osiguranih u Budžetu Grada Tuzla za tekuću budžetsku godinu u skladu sa Odlukom iz člana 18. ove Odluke.

POSTUPAK DODJELE SREDSTAVA

Član 11. (Objava javnog poziva za dodjelu sredstava)

- (1) Dodjela sredstava vrši se putem javnog poziva, koji se raspisuje u jednom sredstvu informisanja na poručju grada Tuzle, uz isticanje na oglasnoj tabli i web stranici Grada Tuzle.
- (2) Javni poziv iz stava 1. raspisuje Grad Tuzla, putem Službe za komunalne poslove, izgradnju i poslove mjesnih zajednica, i isti ostaje otvoren 15 (petnaest) dana, računajući od dana posljednje objave.

Član 12. (Sadržaj javnog poziva)

- (1) Javni poziv iz člana 11. obavezno sadrži podatke o uslovima za prijavu na javni poziv, kriterijima na osnovu kojih se vrši rangiranje podnosilaca prijave, dokumentaciji koju su dužni dostaviti kao dokaz o ispunjavanju uslova, odnosno dokumentaciji na osnovu koje se vrši rangiranje po kriterijima, načinu podnošenja prijave, krajnjem roku do kada se prijave mogu podnijeti, kao i ostale relevantne podatke.
- (2) Rok za dostavljanje dokaza o izvršenom energijskom pregledu za podnosiocima prijave koji navedeni dokaz nisu dostavili uz prijavu na javni poziv iznosi 30 (trideset) dana od dana posljednje objave rang liste iz člana 14. stav 1. ove Odluke.

- (3) Rok za implementaciju mjera smanjenja aerozagađenja koje su predmet sufinansiranja iznosi 90 (devedeset) dana računajući od dana objave rang liste iz člana 14. stav 2. ove Odluke.

Član 13.

(Komisija za provođenje postupka po javnom pozivu)

- (1) Za provođenje postupka po objavi javnog poziva iz člana 11. ovog člana Gradonačelnik Grada Tuzle rješenjem imenuje posebnu komisiju.
- (2) Komisiju iz stava 1. ovog člana čini 5 (pet) članova odgovarajuće struke, od kojih su dva člana iz Službe za prostorno uređenje i zaštitu okoline, dva člana iz Službe za komunalne poslove, izgradnju i poslove mjesnih zajednica i jedan član iz JKP "Centralno grijanje" d.d. Tuzla.
- (3) Za svakog člana Komisije imenuje se po jedan zamjenski član.
- (4) Mandat komisije traje do okončanja postupka po javnom pozivu objavljenom u tekućoj kalendarskoj godini.
- (5) Za predsjednika komisije imenuje se jedan od dva člana iz Službe za komunalne poslove, izgradnju i poslove mjesnih zajednica, dok administrativno-tehničke poslove za potrebe komisije obavlja jedan od dva člana iz Službe za prostorno uređenje i zaštitu okoline.
- (6) Neblagovremene i nepotpune prijave komisija ne uzima u razmatranje.
- (7) Komisija o svom radu sačinjava zapisnik.

Član 14.

(Preliminarna i konačne rang liste)

- (1) Po okončanju roka za dostavu prijave komisija iz člana 13. ove odluke utvrđuje preliminarnu listu podnosilaca prijave koji ispunjavaju opće uslove.
- (2) Po dostavljanju dokaza o izvršenom energijskom pregledu u roku iz člana 12. stav 2. i rješavanju po prigovorima iz člana 16. ove Odluke, komisija sačinjava konačne rang liste podnosilaca prijave, posebno za nabavku i ugradnju toplotnih pumpi sa pratećom opremom i radovima, i posebno za nabavku i ugradnju materijala za izolaciju vanjskih zidova i tavanice.
- (3) Prilikom sačinjavanja konačne rang liste iz stava 2. ovog člana komisija iz člana 13. dužna je uzeti u obzir raspoloživi iznos sredstava u Budžetu Grada Tuzle, shodno broju lica u okviru konačne rang liste i iznosima sufinansiranja mjera smanjenja aerozagađenja propisanim u članu 8. ove odluke.
- (4) Preliminarna lista i konačne rang liste objavljuju se na oglasnoj tabli i web stranici Grada Tuzla.
- (5) Smatra se da je podnosilac prijave roku iz člana 12. stav 2. ne izvrši obavezu iz stava 2. ovog člana odustao od prijave na javni poziv.

Član 15.

(Pregled implementiranih mjera)

- (1) Po implementaciji mjera smanjenja aerozagađenja podnosioci prijave Službi za komunalne poslove, izgradnju i poslove mjesnih zajednica dostavljaju pismeni zahtjev za pregled implementiranih mjera.
- (2) Uz zahtjev iz stava 1. ovog člana podnosilac prijave je dužan dostaviti račun-fakturu za implementirane mjere koje su predmet sufinansiranja.

- (3) Podnosilac prijave koji u ostavljenom roku propusti implementirati mjere smanjenja aerozagađenja i dostaviti zahtjev iz stava 1. ovog člana gubi pravo na dodjelu sredstava za sufinansiranje mjera smanjenja aerozagađenja.
- (4) Pregled iz stava 1. ovog člana vrši posebna komisija od pet članova koju imenuje Gradonačelnik i koju čine po dva predstavnika Službe za komunalne poslove, izgradnju i poslove mjesnih zajednica, Službe za prostorno uređenje i jedan predstavnik iz JKP "Centralno grijanje" d.d. Tuzla.
- (5) Zadatak komisije iz stava 4. je pregled i ocjena blagovremenosti i osnovanosti zahtjeva iz stava 1. ovog člana, zajedno sa pratećom dokumentacijom, kao i pregled objekata u cilju utvrđivanja izvedenog stanja u pogledu nabavke i ugradnje materijala i opreme u cilju implementacije mjera smanjenja aerozagađenja koji su predmet sufinansiranja.
- (6) Pored zadataka iz stava 5. ovog člana, u slučaju kada je predmet sufinansiranja nabavka i ugradnja toplotne pumpe, komisija je dužna utvrditi da se u objektu ne koristi uređaj za zagrijavanje objekta sa pogonom na fosilna goriva.

Član 16.
(Prigovor na preliminarnu rang listu)

- (1) Na preliminarnu rang listu iz člana 14. stav 1. podnosilac prijave može podnijeti prigovor, u roku od 8 (osam) dana, računajući od dana posljednje objave preliminarne rang liste.
- (2) Po prigovoru iz stava 1. rješava pomoćnik gradonačelnika za Službu za komunalne poslove, izgradnju i poslove mjesnih zajednica, na osnovu prethodnog pismenog izjašnjenja komisije iz člana 13. Odluke.

Član 17.
(Odluka o dodjeli sredstava)

- (1) Na osnovu konačnih rang listi i nalaza komisije iz člana 15. stav 4. Služba za komunalne poslove, izgradnju i poslove mjesnih zajednica sačinjava prijedlog odluke o dodjeli sredstava za sufinansiranje mjera smanjenja aerozagađenja i istu dostavlja Gradonačelniku na usvajanje.
- (2) Odluka će biti objavljena na zvaničnoj web stranici Grada Tuzle i "Službenom glasniku Grada Tuzla".

NADZOR NAD PROVOĐENJEM ODLUKE

Član 18.
(Inspekcijski nadzor)

Inspekcijski nadzor nad provođenjem odredbi Odluke vrši gradski komunalni inspektor.

Član 19.

Nadzor iz člana 18. vršit će se u periodu od 3 (tri) godine, računajući od momenta ugradnje toplotnih pumpi u objektima korisnika sredstava.

KAZNENE ODREDBE

Član 20.

Novčanom kaznom u iznosu od 300,00 KM do 1.500,00 KM kaznit će se fizičko lice koje postupi suprotno izjavi iz člana 7. Odluke.

Član 21.

Novčanom kaznom u iznosu od 500,00 KM do 2.500,00 KM kaznit će se odgovorno lice u pravnom licu koje postupi suprotno izjavi iz člana 7. Odluke.

Član 22.

Novčanom kaznom u iznosu od 2.000,00 KM do 10.000,00 KM kaznit će se pravno lice koje postupi suprotno izjavi iz člana 7. Odluke.

ZAVRŠNE ODREDBE

Član 23. (Stupanje na snagu)

Odluka stupa na snagu danom objavljivanja u "Službenom glasniku Grada Tuzla".

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD TUZLA
GRADSKO VIJEĆE

**PREDSJEDAVAJUĆI
GRADSKOG VIJEĆA**

Aleksandar Vujadinović

Broj:
Datum: